

Fasnacht 2023



S wird dunggel und kalt

Y bi d Frau Wänger vom dritte Stogg,
deert in dr Brait in däm groosse Blogg.
Mir mache bi däm Stroomspaare mit,
was daas fir Umständ macht, glaube si nit.

Dehai ha ych immer e Faserpelz aa
und die wulligi Unterwösch unde draa.
Y mach 3 mool am Daag my Fitnessbrogramm,
denn isch mr e Viertelstund wider waarm.
Jo, bi 15° kasch nit aifach ummesitze,
sunscht hesch Yyszäpfe an dr Naasespitze.

Woby, bi Corona hesch jo immer lüfte miesse,
hit muess me d Fänschter wider schliesse.
Drbyy bi dääre Winterhitz,
wurd s dinne grad weermer, ämmel e bitz.

Friener, wenn y my in d Badwanne gleggt haa,
d Muusig voll uff und e Cüpli nääbedraa,
d Musggle entspannt und d Hut ganz waich,
hit deerfsch numme no dusche, soone Saich.
Nit lenger als 1 Minute, sunscht besser kalt,
fir daas bin ych definitiv scho z alt.
Y haa drum d Frau Hueber gfroggt,
eb si mit mir in d Wanne hoggt.
Am Mitwuch kenne mer so bi iire baade
und am Samschtig due ych si zue miir yylaade.

Wenn y mit de Komisioone haime wott,
hänn mir im Huus jetz e Liftverbott.
In dritte Stogg mit zwai volle Gugge
due ych d Lunge uusespugge.
Asso, ych mach im 1. Stogg Halt bim Raffi
und dringg deert eerscht emool e Kaffi,
im zwaite Stogg bi dr Frau Rasser,
dringg ych noonemool e Wasser.
Dr letschti Stogg, däa schaff y denne,
gang aaber grad druff aabe go penne.

My Wösch hett syt neiem allewyyl Flägge,
yy deerf sy mit gaar nit me verdrägge.
Mit 40° kunsch halt au nit wyt,
jetz wäsch y 5 mool s Glyche und s bruucht aifach mee Zyt.
Wenn sy denn verrumpflet uss dr Maschine kunnt,
muess y alles in dr Woonig uffhängge, dass bruucht
noomool e Stund.

Denne bin ych als ins Fauteuil gsässe
und haa bim Netflix luege d Zyt vergässe.
Derzue han y glettet wie verruggt
und d Falte uss de Hemmli uusedruggt.
Alles nimm erlaubt, muesch gar nit frooge,
jetz isch alles voll Runzle vo unde bis oobe.

Jo und d Fasnacht wird au numme dunggel und kalt,
do hau y grad ab und gang uff Grindelwald.
S ainzig Guete, wo ych doo wurd see,
s git am Moorgestraich kaini Schaufänschterbeliechtige
mee.

My neis E-Auti muess ych laider dehaime loo stoo,
aaber me kaa jo au mit dr SBB goo.
S Hotel isch waarm, will sy Eel verbrenne,
ych kaa deert wider halbblutt ummerenne.
Ych kaa in d Sauna und dernoo go baade
und genn mr no e Massage fir miini Waade.
D Schylift lauffe und au d Gondelkabyne,
d Pyschte wird gmacht vo dr Schneemaschiine
und zoobe bi Vollbelüchtig im Ässaal,
hesch zwische 4 Gourmet- Menü d Quaal.
Und denn im Färnsee doobe in Grindelwald,
lueg y d Fasnacht und die isch dunggel und kalt.

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwoch demoorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe.

Am Frytig, 3. März und Samschtig, 4. März 2023 findet uf em Barfi die 1. Lektion statt. Fasnacht für alli zum Kennelehre und Usprobiere! D'Zeedellääsete isch am Sunntig noo dr Fasnacht 2023, am 5. Meerz, vom Fimfi bis am Siibeni zoobe, in dr Baseldytschi Bihni (im Lohnhof 4). D Foyer-Bar isch vom Vieri ewäg offe.